





V R A Y

# DISCOVRSSVR

LA DEFFAICTE DES  
Duc d'Aumalle & Sieur de Bal-  
lagny avec leurs troupes, Par le  
Duc de Longue-ville, & autres  
Seigneurs, Et la leuee du siege  
de la ville de Senlis en Picardie.



Faiçt ſuiuant la copie imprimée à Tours,  
Chez Iamet Mettayer Imprimeur  
ordinaire du Roy.

---

M. D. LXXXIX.

Case

F

39

326

1789 VA

THE NEWBERRY  
LIBRARY





*DISCOURS, SUR LA  
deffaicte des Duc D'aumalle & si-  
eur de Ballagny avec leurs troupes,  
Par le Duc de Longue-ville & au-  
res Seigneurs, Et la leuée du siege,  
de la ville de Senllis en Picardie.*



HACVN a peu sçauoir as-  
sez, comme dés la fin du  
may d'Auril dernier, Mon-  
sieur de Thoré pour le seruice du  
Roy, s'acchemina dans la ville de  
Senlis, par l'intelligence des bons  
& fidelles habitans d'icelle, pour  
les maintenir & asseurer en l'obeyf-  
sance deuë à sa Majesté. Il y fut trois  
iours auant que les Parisiens (estō-  
nez de la reduction si soudaine de

4

ladicte ville en l'obeyffance de ladicte Majesté) peussent s'y acheminer, ny conuier le Duc d'Aumalle, de venir avec eux assieger ledict Senlis: Pendant lesquels trois iours ledit sieur de Thore eut tout loysir d'enuitailler & munir la place, tant de viures que de toutes autres sortes de munitions necessaires pour la bien garder & deffendre: mesmes y fit entrer tel nōbre des meilleurs soldats qu'il voulut choisir de chacun des villages de la vallee & Duché de Montmorency, pour se rendre fort dans la ville, avec deux mille combatants pour le moins qu'il y auoit assemblez resoluz de tenir bon, contre toutes les forces qui viendroyent les assaillir: Non point tant pour la forteresse de



la place qui est assez foible, que pour le courage & fidelité des bons habitans & foldats qui y estoïent. Le sieur de Mainneville, qui se dit à present Gouverneur de Paris, pour l'absence du Duc de Mayenne, si achemina des premiers, avec nombre de Parisiens bien armez: le Duc d'Aumale s'y rendit presque aussitost, avec belle cauallerie & beaucoup de gens de pied, & assiegerent la ville au nombre de quatre mille hommes de premiere abordée: Incontinent les Parisiens & autres de leur party, y accoururent de plusieurs endroicts bien montez & esquipez, & si trouuerent en peu de temps enuiron de cinq à six mille hommes assiegeans en bõne conche. Manderent querir l'Artil-

lerie à Paris le vèdredy cinquiém<sup>e</sup>  
jour du present mois de May, la-  
quelle leur fut enuoyee dès le mes-  
me jour au nombre de trois pieces  
seulemēt, deux canons & vne Cou-  
leurine. Et pour ce qu'il ne se trou-  
uoit personne pour la conduire as-  
sez promptement, le moyen dont  
ilz vsèrent est. Que peu de jours au  
parauant reglement ayant esté fait  
à Paris, que de seize Colonnelles  
qu'il y a en seize quartiets ou depar-  
temēt de ladite ville, tous les jours  
en partiroit l'vne, en bon ordre &  
bien complete de vnze a douze  
cens hommes pour le moins, pour  
la garde des auenuës du Chasteau  
de Vincennes: Et estant ledit jour  
de Vendredy escheu que le regi-  
ment du Colonel & Capitaine



d'Aubret estoit assemblé pour aller releuer vn autre regiment & compagnie de la Colonnelle du Capitaine Compans l'vn des Escheuins de ladite Ville de Paris, ledit regiment du Cappitaine & Colonel d'Aubret fut contraint passant sur le pont de nostre Dame, au lieu de tourner par la Greue vers la porte saint Anthonie pour aller audit Chasteau de Vincennes, ou estoient passez peu au parauant leurs bagages, manteaux, viures & charettes, d'aller en auant tout droit par la porte Saint Martin pour conduire ladite Artilerie qui auoit esté menée peu'au parauant vers le Bourget, sous la charge du Brigard Procureur de l'hostel de ville, & arriuerent le lendemain samedi au

soir deuant Senlis, ou de prime ar-  
 riuee, saluèrent la Ville d'un coup  
 de Canon, au son duquel soudain  
 tous les soldats se trouuerēt sur les  
 murailles de la Ville, offrirent de  
 faire telle bresche qu'on leur de-  
 manderoit, sans vser de Canon,  
 pourueu qu'ils promissent de se pre-  
 senter à l'affaut: & sur ce qu'au mes-  
 me instant ils furent sommez de se  
 rendre à composition, promirent  
 d'en faire responce au l'endemain,  
 dont le bruit vint incontinant à Pa-  
 ris qu'il offroyent soixante mille  
 escus au dire des vngs, & cent mil  
 au dire d'autres: & neantmoins  
 pour leur responce, ils mirent & es-  
 tendirent sur leurs murailles par le  
 dehors vne grande toile peinte,  
 où ils auoyent pendu par effigie en  
 vne



vne potéece à deux, le Duc de May-  
 enne d'un costé, & le Duc d'Aumal-  
 le d'autre: & la dame de Montpen-  
 fier à genoux au pied de la potence  
 toute descheuelée, qui ploroit s'ar-  
 rachant les cheueux: & crierent a-  
 uec iniure & opprobres que c'estoit  
 le pourtraict de la composition  
 qu'ils demandoient. Cela les es-  
 meut de r'enuoyer à Paris deman-  
 der renfort de canon, pour mettre  
 tout en poudre, ce disoient-ils, ils  
 en furent esconduits pour le peu de  
 moyen qu'on auoit de ce faire, à  
 faute de boulets, & de telles pieces  
 qu'on demandoit, & en partie auf-  
 si pour la deffiance qu'ils auoient  
 du Duc d'Aumalle, qui les auoit re-  
 fusez & esconduits beaucoup de  
 fois d'aller se ioindre avec le Duc



de Mayenne, à cause de l'ambition  
 qui est entre-eux : Aussi qu'ils te-  
 noient que le sieur de Ballagny s'y  
 acheminoit avec beaucoup de bel-  
 les forces & sept pieces de canon.  
 Auparavant l'arriuée duquel sieur  
 de Ballagny, ceux de Senlis firent  
 sortie de cent cheuaux, dont les as-  
 siegeans eurent telle espouuante,  
 qu'ils se cuiderent mettre en route,  
 & specialement les Parisiens qui  
 quictèrent leurs armes, fuyans & se  
 cachans dans les buissons & de tous  
 costez: desquels cent cheuaux cin-  
 quante seulement rentrerent dans  
 la ville, & les cinquante autres prin-  
 drent la campagne pour ramasser  
 le secours qui s'y achemina par  
 apres. Adonc ledit sieur de Balla-  
 gny avec ses troupes arriua, & se

ioignit avec ledict Duc d'Aumalle,  
 & commencerent la battrie avec  
 leurs dix pieces de canons le Mer-  
 credy xvij. iour de ce presant mois  
 de May, & peu apres les soldats en  
 confusion donnerent vn assaut à la-  
 dite ville par la bresche faicte au-  
 dict iour, qui estoit à la verité assez  
 grande: Neantmoins ils furent re-  
 poussez, pource qu'ils s'estoient ad-  
 uancez sans l'ordonnance du Ge-  
 neral de l'armee. Sur le midy vint  
 aduis que le Duc de longue ville  
 accompagné des sieurs de Humie-  
 res, Bonnyuet, de la Nouë, de Gi-  
 ury, de Mesuillier, de la Tour &  
 autre Noblesse de la Prouince de  
 Picardie, s'approchoiēt en nombre  
 de mil cheuaux & trois mil homes  
 de pied pour secourir la ville de



Senlis: Surquoy ledit Sieur de Bal-  
lagny se mit aux chāps avec la plus  
gaillarde force qu'il peust choisir,  
accompagné des Sieurs de Mayne-  
ville, de Sayffeual, de Mesieres, de  
Cōgy & autres, & à l'abbordee ap-  
prochant ledit Duc de Longue-vil-  
le, la Cauallerie de Cambray mar-  
choit en belle ordonnance, pour  
deffaire l'infanterie dudit Duc de  
Longue-ville, laquelle Infanterie  
s'ouurit par le millieu pour donner  
lieu & passage à leur artillerie, qui  
donna dans lesdits Cambresiens &  
Vvallons de telle furie qu'ils furent  
contraints pour le grand nombre  
qu'elle en renuerſa, de s'escarter &  
reculer en arriere: Puis la meſlee &  
le combat ſ'eſtant donné fut ſouſte-  
nu de part & d'autre bien furieuſe-



ment, chacun combattant de grande animosité, l'artillerie dudit Duc de Longue-ville faisant beaucoup de dommage aux gens dudit Duc d'Aumalle, de telle sorte que les soldats commencerent à prendre l'espouuante si grande, que ledit Duc d'Aumalle ny le sieur de Balagny ne peurent iamais par leurs viues parolles & remonstrances les rallier, de maniere que l'armee assiegeante se mist incontinent en route: Ce qui donna hardiesse audit Duc de Longue-ville de les poursuiure à coups de coutelats avec les assiegez, lesquels au mesme temps firent vne sortie. Par laquelle expedition ils se sont assurez de la ville de Senlis, ont gagné toutes les munitions dudit Duc d'Aumal-

le, poudres, boulets, l'artillerie, enuirō de xv. cēts à deux mil morts sur la place, sans ceux qui ont esté tuez & poursuiuis en fuyant par les villages. Ledit Duc d'Aumalle blecé, & le sieur de Ballagny aussi blecé au visage, toutesfois assez petiment: & se retira ledit Duc c'Aumalle à S. Denis, craignant de n'estre assuré, ny le bien venu dans Paris: & le Sieur de Ballagny se sauua fuyant iusques dans Paris, feignant de vouloir mettre ordre à r'allier ses soldats pour faire teste aux ennemis, & pour r'encourager les braues soldats de Paris.



COPIE D'VNE LET-  
tre escripte par vn Seigneur à vn  
sien parent, du vingtiesme de  
May, 1589.

**M**ON Cousin, i'ay retenu ce postil-  
lon iusqu'à ce qu'il me fust venu  
quelques bonnes nouvelles. Je les ay re-  
ceues presentement par vn homme que  
i'enuoyé à Paris. Il a veu la route de  
Monsieur d'Aumalle qui a esté deffait  
pres Senlis, par Monsieur de Longue-  
ville, accompagné de Monsieur de la  
Noüe. Il s'est sauué luy troisieme à S.  
Denis, Ballagny s'est sauué à Paris, qui  
r'asseure le peuple qui est tout effraié de  
ceste deffaire. Il leur promet nouvelles  
forces du pays bas: mais qu'il ait de l'ar-  
gent. Iugez si c'est pour les bien remet-  
tre. Ils ont perdu dix pieces de batterie,



trois de l'Arcenal, six de Peronne &  
vne d'Amiens. Cela fut fait Mercredy  
au soir. Mon homme ne m'a sceu dire  
leurs morts: car il s'en est venu en dili-  
gence m'apporter ceste bonne nouvelle,  
faictes en part à Messieurs le Garde  
des Seaux, & de Souvray. Vous avez  
sceu ce que Monsieur de Chastillon fait  
aussi leudy au soir. Ceste semaine leur  
à esté mal-heureuse, comme i'espere que  
sera toute l'année. Continuez moy vostre  
amitié, & faictes estat, mon Cousin, que  
ie seray tousiours,

Vostre affectionné Cousin  
& meilleur amy, M. R.



